



Imartani sillimaniarnerup, umiarsuarnik nalunaarsuinerup il.il. tamakkiisumik oqartussaaffigineqalersinnaaneri pillugit Naalakkersuisut UKA 2016-mi nassuiaammik saqqummiussinissamik peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasorta q Nikolaj Jerimiassen, Siumut)

Siullermik siunnersuuteqartoq Nikolaj Jeremiassen, Siumut qutsavigerusupparput siunnersuummik oqallisigissallugu pisariaqarlunnartumik qaqitsimmat.

Oqartarpugut nunami maani inuutissarsiutitta pingaarnersarigaat aalisarneq, aamma nunarput imartarujussuaqarmat eqqumiigineqartarpoq imarsiornermut inatsisit aqunneqarneri soq taama Naalakkersuinikkut nunatsinniit aqunneqarnissaat pingaartinneqanngitsiginersoq.

Inatsisit imarsiornermut tungasut imarsiornermullu suliassaqarfiit tamarmik Danmarkimiit aqunneqarput. Nunatsinniluunniit imarsiortut illersorneqarnissaat pillugit nunat tamalaat akornanni inatsisiliarineqartartut atuutsinneqanngillat naak oqartaraluarluta nunatta aalisarneq pingaarnertut inuutissarsitigigaa.

Pingaarnertut inuutissarsiuupput aalisarneq pingaarteqaarput, taamaammat tamatuma malitsissai akisussaaffiit imarsiornermut tungassuteqartut Naalakkersuinikkut pingaartinneqarnerullutik sulissutiginnissaat piumasarisariaqalerparput.

Naalagaaffiup nunatsinni imaatigut angallannermut, aalisariuteqarnermut isumannaallisaaneq ingerlataaraa apeqquserneqarsinnaavorli Naalagaaffiup Danmarkip akisussaaffini iluamik kivissinnaanera ilaatigummi ilisimavarput nunatsinni inuutissarsiutigalugu aalisartut angallataat naammangitsumik nakkutigineqarmata, aalisarneq qiviaannaraanni umiatsiararsortorpassuit angallataatilittut nalunaarsorneqarneq ajorput inuutissarsiummi nakkutiginninnermut ajornartorsiutissiisinnaasartumik.

Angallatitoqarsuit nunatta avataaniit eqqussuunneqartut avatangiisillu eqqarsaatigalugit mingutsitsisinnaanerat ajornartorsiutaalersartut nakkutigineqanngillat. Imarsiortortavut inatsisitigut illersorneqanngillat nunatsinni sømandslov nunat tamalaat akornanni imarsiortunut illersuutaasartoq atuutsinneqanngimmalluunniit.

Tamakkorpassuit eqqarsaatigalugit Inuit Ataqatigiinniit Inatsisartunut ilaasortap Nikolaj Jeremiassen-ip siunnersuutaa taparserparput, aappassaaneerineqartinnagulu Inatsisartut aalisarnermut Piniarnermut Nunalerinermullu ataatsimiisitalianut ingerlaqqissasoq inassutigalugu.